

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"Ei te ture, ei te parau, ta ratou e imi; ia ore ia faaau i ta ratou parau i taua parau ra, no te pouri ia i na reira'i ratou ra." Isaia 8: 20.

Nu. 9.

10 Tiunu, 1911.

Mat. 4.

No Te Ravea Bapetizoraa.

E HIA ravea e oti ai te bapetizoraa? Na ô maira te vea Katorika e toru ia, oia hoi, te faahopuraa, te niniiraa e te pipiraa. E te haapii nei ratou e mea tia ana'e taua na ravea e toru ra. E au mau hoa e o tei taio i teie nei parau, e mata na tatou i te imi i te ravea mau no te bapetizoraa i ravehia e te mau tavini mau o te Fatu. Uiraa: Nohea te bapetizo a Ioane, no te ra'i mai anei e na te taata anei? Teie te pahonoraa, no te ra'i mai, no te mea i tonohia mai oia e te Atua. Ioane 1: 6. Te na ô nei te Katorika e toru ravea no te bapetizoraa. Te na ô maira te parau a te Atua. Hoê hoi Fatu, hoê faaroo, hoê bapetizo, e taua bapetizo nei o te bapetizo ia a Ioane, e te ravea i ravehia e a'na ia bapetizo atu i te taata, oia te bapetizo utuhi. "E te feia atoa i faaroo ra, ua faatia ia i te Atua ua bapetizohia hoi ratou i te bapetizoraa a Ioane ra. Area te mau Pharisea e te mau haapii ture ra, ua vahavaha ia i te a'oraa a te Atua ia ratou iho, aore hoi ratou i bapetizohia e a'na." Luka 7: 29, 30.

Ua haere maira ia'na ra to te fenua'toa ra to Iudea, e to Ierusalema taatoa, e ua bapetizohia ihora e a'na i te pape ra

i Ioridana, ma te fai i ta ratou mau hara. Mar. 1: 5. I haere maira ratou ia'na, ei reira i arataihia ratou e a'na i te pape ra i Ioridana i baptizohia e a'na, i te ravea baptizoraa utuhi, (oia hoi ua tanuhia ratou e a'na i raro roa i te pape.) Aore te parau i faaite mai ia tatou e, ua arataihia te taata e Ioane i roto i te fare pureraa, e i reira ua rave oia i te tahi maa pape e ua ninii atu, e aorerâ ua pipi atu te reira i nia i te upoo taata ei baptizoraa, area râ te faaite nei te bibilia ua rave Ioane i te ravea utuhi ia baptizo oia i te taata. Teie te parau: "E oti a'era Iesu i te baptizohia e Ioane haere maira oia i nia mai raro mai i te pape." Mat. 3: 16. E homa e, e hi'opoa rii tatou i teie nei parau, no te mea teie te ravea baptizoraa no te ra'i, e ere ia i te ravea apî i haapiihia e te taata, na te Atua râ. Te na ô nei te parau: "e oti Iesu i te baptizohia haere maira oia i nia mai raro mai i te pape." Ei reira ua baptizohia Iesu i te baptizoraa utuhi, e te ravea baptizoraa te reira no te ra'i mai. E o Iesu te e'a e na te uputa â te tia'i mamoe i te tomo, ia peehia oia e te mau mamoe e tia'i, ia noaa te ora. E o te pauma e aore râ o tei ô na te tahi e'a ê ra, o tei ore i faaitehia mai e Iesu e ta'na mau pipi mau ra e eiâ ia e te haru. Ioa. 10. No reira ua haapii papu roa Iesu ia Niko-demo: "Ia ore te taata ia fanau i te pape (oia hoi ia baptizohia i te pape) e te varua, e ore oia a ô i te basileia o te Atua ra." Ioa. 3: 5. E teie nei râ ua taa ê roa te mana'oo te Katorika e to Ioane Baptizo. Ua ite papu roa oia e e mea tia roa te ravea utuhi a baptizo atu ai oia i te mau taata e rave rahi e o Iesu atoa hoi i roto i te anavai ra o Ioridana e i Aino hoi te vahi pape rahi. Ioa. 3: 23.

Ua baptizo anei Phila i te eunuka i te ravea niniiraa e aore râ i te pipiraa? Aita roa ia. Te na ô maira tei papaihia ra. "E haere atura raua i raro i te pape, o Phila e te eunuka atoa ra e baptizo atura oia ia'na. E tae maira raua i nia mai raro mai i taua pape ra." Ohi. 8: 38, 39.

Te faaite papu mai nei teie tau irava e, ua baptizo-mau-hia te eunuka i te baptizoraa utuhi, te ravea te reira i baptizohia'i Iesu.

Ua faaau atoahia te baptizoraa i te tanuraa. E teie nei ua tanuhia tatou e oia atoa i te baptizoraahia i roto i to'na ra pohe; mai te Mesia i faatiahia e te mana o te Metua i te poheraa ra, ia haapao atoa tatou i te haerea e au i te ora apî. Rom. 6: 4. Kol. 2: 12.

Tei raro nei te tahi mau parau faaite e itea-papu-hia e o te utuhiraa te huru baptizoraa i haapaohia e Ioane Baptizo e te tahi atu â mau tavini no Iesu, e o te niniiraa e te pipiraa o na ravea apî ia i faaôhia mai i roto i te mau haapaoraa a te taata nei e rave rahi mai te faaue-ore-hia e te Atua.

E au mau hoa taio parau e, eaha te auraa no te parau Baptizo? Na te feia paari e pahono mai. Na ô maira te orometua tuiroo rahi ra o Lutero. "O te parau Baptizo e parau Heleni ia, utuhiraa te faaauraa, mai te utuhi i te tahi mea i raro i te pape ra. E e hinaaro hoi to'u ia utuhi-roahia te feia atoa e baptizohia i raro i te pape, ia au i te parau Baptizo e ei faatiaraa hoi i te auraa mau o te oroa baptizo." Te na ô atoa mai te taata haapii Bibilia e te ite rahi i te mau re'o êë, o Robinson. "Ua hau te ite o te feia Heleni mau i to ratou iho re'o i to te taata êë ra; e mai te matamua mai â ua tamau maite ratou i te utuhiraa ei auraa no te parau baptizoraa e no reira mai te mahana matamua mai â i farii mai ai ratou i te haapaoraa Kerisetiano, ua utuhi ratou i te taata ei baptizoraa, e te na reira nei â ratou e tae roa mai nei i teie nei mahana." Teie atoa te parau na te orometua tuiroo ra o Jeremy Taylor. "Te peu tamau no te baptizoraa i roto i te ekalesia matamua, e ere ia i te pipiraa, te utuhiraa râ, e au maite ai i te auraa o te parau baptizo e te faaue o te Faaora Maitai Rahi e to'na iho baptizoraa ei aveia." Tera atoa mai te parau no te oro-

metua tuiroo rahi ra o Kalavina. "Te auraa o te parau bapetizo e utuhiraa ia e o te utuhiraa te huru bapetizo i haapao-hia i roto i te ekalesia i te tau tahito." E te haapao atoa nei matou i te ravea bapetizo utuhiraa ia matara te hara, te bapetizoraa no te ra'i, te ravea bapetizoraa i bapetizohia'i Iesu. E te ravea tia mau râ teie, e aita'tu. Area teienei na ravea apî i haapiihia mai e te Katorika e mea tuuhia mai ia e te taata ana'e mai te faaue-ore-hia mai e te Mesia.

I nafea te faatupuraahia o taua na ravea apî bapetizoraa? Tera mai ia to'na faatupuraahia, tei te pae matamua o te tenetere toru i muri a'e i te Mesia. O vai te io'a o te taata matamua i bapetizohia i taua ravea apî? Teie to'na i'oa, oia hoi, o Novatu (Novatus). Eaha te tumu i bapetizohia'i oia i taua ravea apî? Teie ia, no te mea e, ua ma'ihia e ua paruparu, e ua mana'ohia e te taata e pohe oia. E no reira ua bapetizohia oia i te ravea apî, oia hoi, te niniiraa, a taoto noa'i oia i nia i te roi. E inaha mai reira mai â ua parare roa'tura taua na ravea apî hape rahi roa, oia hoi, te niniiraa e te pipiraa ei bapetizoraa i roto i te mau haapaoraa e rave rahi. E te hoê vahi teie i faahuru-ê-hia te evanelia mau ra. Area eiaha e maere, ua faaite atea maira Paulo e tupu te reira huru haapaoraa i roto i te ekalesia. Na ô maira oia, te vai atura hoi te tau e ore ai ratou e farii ai i te parau mau no te anoenoë ra o to ratou tari'a, e haaputu ia ratou i te orometua i au i to ratou iho hinaaro e fariu ê hoi to ratou tari'a i te parau mau. 2 Tim. 4: 3, 4. Na ô maira te peropheta: "Ua hapa ratou i te ture ra, ua ruri-ê-hia e ratou tei haapaohia ra." Ua na ô hoi te Mesia: "E mea faufaa ore râ ta ratou e pure ia'u nei a haapii ai i tei tuuhia mai e te taata ana'e ra."

—VILIAMU SETEMILA.

"I tanu-atoa-hia outou e oia atoa i te bapetizoraa ra, e i faatia-atoa-hia hoi i reira i te faaroo i te ravea puai rahi a te Atua, o tei faatia mai ia'na mai te pohe maira." Kolosa 2:12.

Te Parau Tuatapapa no
Iosepha Semita.

(TUATIRAA.)

PENE IX.

MATAHITI 1829.

Te parau faaite a Te Buka a Moromona e ta na ite tootoru.

Te parau faaite hoi a Te Buka a Moromona e ta na ite toovau. Te faaho'iraahia mai o te Autahu'araa o Mele-hizedeka. Te faaotiraahia o te ohipa iritiraa.

TE rave ra Iosepha raua o Olive Taudere i te ohipa iritiraa parau êë no nia mai i te mau api auro, ei reira ua iteahia e raua e, ia faaitehia mai na taata tootoru i te mau api auro e tia'i, ia riro ratou e mau ite mau i te reira no to te ao atoa nei. Ei reira ua parau mai Olive Taudere e o Davida Vitima e o Maratini Hareti ia Iosepha e ani i te Atua ia faatia ia riro ratou taua na ite no Te Buka a Moromona. I te avae Tiunu i te matahiti 1829 ua pure ihora Iosepha, ei reira ua tae mai te parau a te Atua ia'na, na ô maira, mai te mea e e tiaturi papu ratou i ta'na parau ma te aau tae e te feaa ore e hi'o ratou i te mau api auro. E i muri iho i te reira, haere atura ratou toomaha ra i te vahi uru raau e pure i te Atua ia faaite mai oia ia ratou i te mau api auro. Ua tuturi ihora ratou atoa, e ua pure Iosepha, e i muri iho ua pure Olive e ua na reira atoa Davida e o Maratini, area râ aore e pahonoraa i tae mai. Ua pure faahou â ratou e hope roa'e, aita râ e pahonoraa i tae mai. E i reira ua faaite mai Maratini Hareti ia ratou e o oia te tumu i ore i tae mai ai te pahonoraa. E i reira tia a'era oia i nia haere ê atura, pure atura i te Atua. E oia mau atura tei parauhia e a'na ra, no te mea i muri itî a'e i to'na haereraa'tu ua tae mai te tahi melahi e te mau ra oia i te mau api auro e ua huri maite oia i te mau api i mua ia ratou e ua ite papu ia

ratou te mau papairaa êë i ootihia i nia ihora. E i reira faaroo a'era ratou i te re'o o te Atua i te parauraa e, e mea horoahia mai ia te mau api auro i mua ia ratou. E ua faauehia ratou e te Atua ia faaite atu i to te ao atoa nei e, ua iritihia te mau parau i nia iho e te mana o te Atua, e e mea tia hoi te iritiraa. Ia hope te orama ua imi haere Iosepha ia Maratini e ua iteahia, te pure ra oia i te Atua ia faaorehia ta'na mau hara e tia'i, ia ite atoa oia i te mau api auro. E i reira ua pure raua toopiti e aita i maoro ua tae mai te melahi ia raua ra e ua faaite atoa mai oia i te mau api auro ia Maratini, oaoa ihora oia e ua haamaitai'tu ra i te Atua. E muri a'e ua papai ihora taua na taata tootoru ra i teie nei parau e faaiteraa'tu i ta ratou i ite mata e ta ratou i faaroo tari'a, e teie hoi taua parau ra.

E PARAU FAAITE A NA ITE TOOTORU.

Ia ite to te mau fenua atoa, e te mau nunaa atoa, e te mau re'o atoa, e te mau opu atoa e taehia i teie nei buka e, ua ite matou, na roto i te maitai o te Atua ra, o te Metua, e o to tatou Fatu ra o Iesu Mesia, i te mau api no reira mai teie nei papaa parau, o te papaa parau ia no te ati Nephi, e no te ati Lamana, to ratou mau taeae, e no te mau taata hoi o Iareda ra, o te haere mai mai te pare maira o tei parauhia ra; e ua ite atoa hoi matou e, ua iritihia teie nei parau e te horoa e te mana o te Atua ra, no te mea ua faaite mai oia i te reira ia matou i to'na re'o; e no reira i ite papu ai matou e, e parau mau ia ta teie nei buka. E te faaite atoa'tu nei matou e, ua ite matou i te mau parau i ootihia i nia iho i te mau api ra; e ua faaitehia mai ia matou e te mana o te Atua, e ere ia te mana o te taata. E te faaite atu nei matou ma te parau mau e, i fa maira te hoê melahi a te Atua no te ra'i mai, e ua hopoi maira, e ua tuu maira hoi oia i taua mau api ra i mua ihora i to matou mata; e ua ite matou i taua mau api ra, e te mau parau i ootihia i nia ihora; e ua ite hoi matou e, na roto i te maitai o te Atua, te metua ra, e no to tatou Fatu ra, no Iesu Mesia, i ite ai matou e te faaite atu nei hoi e, e parau mau ia teie mau mea nei; e mea maere hoi ia ia matou, area ua faaue maira te re'o o te Atua ia faaite atu matou i teie parau nei: e teie nei, ia haapao matou i te mau faaue a te Atua ra, te faaite atu nei matou i teie mau mea. E ua ite papu matou e, mai te mea e haapao matou i ta te Mesia ra, e mâ to matou ahu i te toto o te mau taata atoa ra, e e tia hoi i mua i te haavaraa a te Mesia ma te

porao ore, e e parahi i pihaiiho ia'na i te ra'i ra e a mure noa'tu. Ei te Metua, e i te Tamaiti, e i te Varua Maitai, hoê roa ia Atua, te hinuhinu. Amene.

OLIVER COWDERY,
DAVID WHITMER,
MARTIN HARRIS.

E muri ihora ua faaite atoa'tu Iosepha i te mau api auro i na taata toovau. E teie tei parauhia e ratou.

E PARAU FAAITE HOI A NA ITE TOOVAU.

Ia ite to te mau fenua atoa, e te mau nunaa atoa, e te mau re'o atoa, e te mau opu atoa e taehia i teie nei buka e, na Iosepha Semita, o tei iriti i teie nei parau, i faaite mai ia matou i te mau api i parauhia'enei; e mai te auro ia ia hi'ohia'tu; ua fafa hoi to matou iho rima i te mau api atoa i iritihia e taua taata ra, e Semita; e ua ite hoi matou i te mau parau i ootihia i nia iho; ua au te reira i te ohipa tahito e te huru ê hoi. Te faaite atu nei matou i teie nei parau ma te parau mau, na Semita te mau api i faaite mai ia matou, ua fafa e ua faito rima hoi matou i taua mau api ra, e te ite papu nei matou e, tei taua taata ra, o Semita, taua mau api ta matou e parau nei. Te tuu atu nei matou i to matou mau i'oa i to te ao nei, ei faaite i to te ao nei i ta matou i hi'o ra; e aore ia matou i haavare, o te Atua hoi tei ite.

CHRISTIAN WHITMER,
JACOB WHITMER,
PETER WHITMER, JUN.,
JOHN WHITMER,

HIRAM PAGE,
JOSEPH SMITH, SEN.,
HYRUM SMITH,
SAMUEL H. SMITH.

I na matahiti i muri a'e i te papairaahia o taua parau faaite a na ite tootoru no Te Buka a Moromona, ua taiva roa taua na ite tootoru, oia hoi, o Olive Taudere e o Davida Vitima e o Maratini Hareti i te ekalesia e i te matahiti 1838 ua hurihia ratou atoa i rapae. E ua vai noa râ Olive Taudere i rapae au i te ekalesia e 9 matahiti. E tei rapae hoi Maratini Hareti i te ekalesia e 33 matahiti. Ua amui faahou mai râ raua i te ekalesia e tei te ekalesia raua a pohe atu ai. Area o Davida Vitima aore roa oia i amui faahou mai i te ekalesia, pohe ihora oia i rapae au. Teie râ taiva noa'tu ratou aita roa te hoê o taua na ite tootoru ra i huna e hoê iti a'e i te parau i faaitehia e ratou no Te Buka a Moromona e tae noa'tu i to ratou poheraa. Area râ ua parau noa ratou e

tae noa'tu i te hopea e parau mau roa e te haavare ore tei parauhia e ratou no taua buka ra. E e buka parau mau Te Buka a Moromona. I te mahana i tae mai Ioane Bapetizo e ua faatoroa oia ia Iosepha raua o Olive Taudere i te Autahua'araa o Aarona ua faaite mai oia ia raua e e faatoroa-hia raua i te Autahu'araa o Melehizedeka i te tau i muri nei. E i te avae Tiunu i te matahiti 1829 ua tae mai Petero e o Iakobo e o Ioane, e i reira ua faatoroa ratou ia Iosepha raua Olive Taudere i te Autahu'araa o Melehizedeka. E i muri iho i te reira ua tia roa ia rave raua i te ohipa a te Atua no te mea ua noaa ia raua te mana no te ra'i mai, (e ere ia te mana i tuuhia mai e te taata, na te Atua râ.) Ua faaotihia te ohipa iritiraa i Te Buka a Moromona, e i te avae Atete i te matahiti 1829 ua haamatahia te ohipa neneiraa, e i te avae Mati i te matahiti 1830 ua faaotihia taua ohipa ra. E teie te rahi o te mau buka i neneihia i te neneiraa mata-mua, oia hoi e pae tausani. (E teie nei ua iritihia taua buka ra i te mau re'o êê e rave rahi, e ua tae atu taua buka ra i te mau fenua e rave rahi.) E i oti Te Buka a Moromona i te iritihia, ua afai atu Iosepha raua o Olive i te mau api auro e te mau mea mo'a, tei tuuhia mai e te melahi ia raua, i te aivi ra o Kumora ei reira e vai ai e tae noa'tu i te tau i haapaohia e te Atua.—VILIAMU SETEMILA.

(E tuatihia mai teie parau.)

“E no te faaoraraa i te taata na roto ia Iesu Mesia, e tae faahou mai ai ratou i mua i te aro o te Fatu; oia mau, ua na reira te mau taata atoa i te faaorahia ra, no te pohe-raa hoi o te Mesia i tupu ai te tia-faahou-raa, e no te reira e ora'i te taata i te taoto mure ore, ia oto te pu ra, e faaara-hia te mau taata atoa e te mana o te Atua i taua taoto ra; e e tia ana'e maira ratou, o te taata rii e te feia rarahi, e e tia mai i mua i to'na ra haavaraa, o te ora ia ratou e te faataa-ê-hia i te tapea mure ore no te pohe, o te pohe tino taua pohe ra.” Moromona 9: 13.

Tomoraa Fare Pureraa.

E OROA rahi faahiahia e te maitai roa hoi o tei faatupuhia i nia i te aivi ra o Heberona i Faaa, i te 19 no Me, 1911, no te ohipa tomoraa fare pureraa.

Ua haamatahia taua tomoraa ra i te hora piti i te ahi-ahi, mai te tairuru atoa mai te feia o tei titauhia'tu ia haere mai i taua oroa ra. E ua tae atoa mai te fetii arii o Hinoi e o Teariinui, mai te peehia mai e Marautaroa e vetahi atu â mau taata, oia hoi te tonitara Amerika te mau hootao'a, te mau taata toroa i roto i te tahi mau haapaoraa. Ua faaterehia taua tomoraa mai teie te huru. Ua putuputu taua nahoa rahi ra i pihaiho i te fare pureraa.

Ua himenehia e piti pupu himene na to Punaauia no te faaiteraa mai i ta ratou mau tao'a aroha. E i muri mai ua himene te pupu no Heberona no te toparaa i te io'a ra ia Peniera. E i muri iho ua himene faahou te hoê pupu no Punaauia no te haapapuraa i taua i'oa ra o Peniera. E i muri iho ua himenehia te hoê himene no te taviriraa i te opani no te fare e te pupu no Faaa o te mairihia te i'oa i te fenua ra o Iudea. E i reira ua haere ana'e te taata i roto i te fare pureraa. E i oti te hoê himene ua tia te taata ra o Tuteirihia o tei rave i te ohipa faatahinuraa. E i oti a'era ua tia mai te orometua ra o Viliamu Setemila e ua faaite mai oia i te tahi mau parau au no taua pureraa. Muri iho ua tia mai te orometua o Henry Deane no te haapaoraa Mahana Hitu, e ua a'o atoa mai i te parau maitai no taua putuputuraa.

Ua tae ana'e te taata i rapae, ei reira ua faatura ratou i te hutiraa i te reva Farani, e ua himenehia te hoê himene no te faahanahanaraa, e ua pupuhihia na pupuhi 15 harururaa no te faatura i te hau Farani. E ia oti taua faahanahanaraa ra, ua haere te taata atoa i nia i te mau iri airaa maa o tei faanahonaho maitai-roa-hia i raro a'e i te hoê tamaru rahi faahiahia, o tei faaunauna maitai-roa-hia e ua

riro atoa te mau peu i tuuhia i nia iho i te mau tipera ei unauna faahiahia e te popou hoi ia hi'o noa'tu. Ua rau hoi te mau huru maa, e e mea maitai ana'e.

Te rahi no te taata o tei tairuru i taua oroa ra, ua taea i te 1000 e tiahapa'tu. Teie te faito o taua fare pureraa: Te roa, 54 avae; te aano, 20 avae; te teitei, 11 avae; teitei o te pinio, 8 avae; ia amui i te 11 e te 8 ua roaa 19 avae.

Te mau tao'a aroha no taua fare pureraa ta te mau taata i horoa mai. Oia hoi, Pupu Himene Talirea no Punaauia, 1 Bibilia, 1 buka himene, 1 ramepa; Pupu Himene Peniamina no Punaauia, 1 mori uira; Atini Tinito, 1 uati rahi; Papai, 1 ramepa; Teariinui, 2 ramepa; Pupu Himene no Patutoa, 1 ramepa; Afu Tinito, 1 ramepa; Teve 2 ramepa; Tamaiti no te Tamuta, 2 ramepa; Viliamu, 1 Buka a Moromona; te Pupu no Faaa, 25 dara moni; Wili, 10 dara moni.

Te Mau Parau Api.

ITE te fenua ra o Fiti te ma'i piupuu i teie nei, e e rave rahi te taata tei pohe roa. O te haamataraa teie o taua ma'i ino roa ra i te fenua Fiti.

I te 25 no Me ua tae mai i Papeete nei te tahi pahi rahi auahi Farani. Teie te tumu i tae mai ai, maori râ e afai mai i te mau tauhaa e rave rahi no te mau fare toa. E e rave oia 1,400 tane puha, e i muri a'e e haere oia i Makatea e rave 3,000 tane one (phosphate) e afai'tu i te fenua papaa.

I te oire Toronoto, Canada, i Amerika i te avae Eperera ua pohe roa te hoê taata. E teie hoi te tumu no to'na poheraa, oia hoi, ua haapae oia i te maa e 15 mahana. Ua maere noa te mau taata i te reira, no te mea i na matahiti e piti i mairi a'enei ua haapae ihora oia i te maa e 21 mahana, aore e peapea e aore roa oia e ino noa'e.

Te tamai noa ra te orure hau i te fenua ra o Mexico i Amerika. E i te tahi aroraa te fatata roa maira i te otia fenua, e ua puta te tahi mau taata Amerika o tei tia noa i reira e mataitai atu i taua tamai ra, pohe roa'tura te tahi pae. Te manuïa pinepine atura te orure hau i rôtô i te tamai. E huru paruparu te nuu no te hau, ahiri aita râ ua tinai-ê-hia na ia taua peapea ra.

I Afarika Apatoa ua itea te hoê daiamani apî, e 254 kara to'na teiaha. I parauhia te hoê teie o na daiamani e ono e hau i te rahi e te faufaa hoi o te mau daiamani i iteahia i te ao atoa nei.

I te 12 no Eperera ua tupu te tahi mata'i rahi puahi'ohi'o ino roa i nia i na tufaa fenua rahi, oia hoi, o Missouri, e o Oklahoma, e o Kansas, e o Arkansas i Amerika. E i parauhia ua pohe roa 25 taata. Ua haaparuparuhia 100 taata. E e rave rahi te mau fare e te mau faaapu hoi ua pau ia'na. E ua ere te mau taata e rave rahi i te fare, e ua roohia ratou i te ati rahi. Teie râ aita i maoro i muri iho ua tauturuhia ratou e te mau taata e rave rahi.

E maha matahiti mairi a'enei ua faarue te tahi pahi ta i'e i te fenua Beritani. I te tereraa ua roohia ratou i te mata'i ino roa, e ua pohe roa te raatira. E 13 avae i muri a'e ua tae ratou i San Francisco. Mai reira haere tia'tura ratou i Ausaralia, e i te tereraa'tu roohia faahou maira ratou i te mata'i rahi e te miti hoi, pee'tura te raatira apî i te miti, pohe roa ihora. Ua reva faahou ratou mai Ausaralia'tu e inaha ua û te pahi i nia i te tahi ofai rahi, parari ihora te pahi. Muri iho tuu ihora ratou i te boti i raro, hôte atura, farerei maira te tahi pahi iti uira, e i reira ua faaorahia ratou e a'na.

Ua haapaohia te Amuiraa Eperera no te Ekalesia a Iesu Mesia i te Feia Mo'a i te Mau Mahana Hopea Nei i te 4, 5, 6 no Eperera i Takaroa. I parauhia ei amuiraa maitai roa. Ua tahoêhia to te amuiraa mana'o i nia i te mau ohipa i ravehia e i ferurihia. Aita te mârôraa i iteahia i roto i taua amuiraa ra. Ua tupu te oaoa e te mauruuru rahi i roto i te aau o te mau taeae e te mau tuahine i tairuruhia i reira. Teie te tahi ohipa oaoa rahi i oti i te ravehia e taua amuiraa, oia hoi, te baptizoraahia o na vahine tootoru, e Tanito te tahi, e Katorika te tahi, e tamahine taea te matahiti te tahi. E i oti te amuiraa haere ana'e atura te mau taata ma te mana'o e e haapao maitai ratou e tae noa'tu i te hopea ra.

Tei te fenua ra o Purutia te tahi ro o tei parauhia ro apoo. E e ro paari rahi e te ite hoi. Te haaputu nei oia i te mau huru rao'ere rii raau e te huero hoi ei maa na'na i te tau auhune. Te hamani atoa nei oia i te tahi faraoa na'na iho. Teie hoi ta'na peu i rave, oia hoi, te tanu ra oia i te tahi mau huero, e ia tupu rii â e afaihia ratou e a'na i te vahi mahana ia haamârôhia, e ia oti, e faaho'ihia i roto i ta'na apoo; ia auauhia e a'na ei faraoa oihia, muri iho ua hamanihia ei faraoa rairai, o tei afaihia i te vahi rapae ia ama i te mahana, e ia oti râ, e faaho'ihia i roto i te apoo ei maa na'na. Ua riro te huare i anoihia i te huero ia auauhia e a'na ei hopue, no reira e faraoa hopue monamona ta'na.

Ua roohia te oire ra o St. Louis i Amerika i te tahi vero rahi roa i te 13 no Eperera. E i parauhia ua pohe roa na taata tootoru i reira. Ua mairi mai te pape paari mai te huero moa nei i te rahi. Ua parari te mau haamaramarama fare, e ua pau hoi te mau faaapu e rave rahi i taua pape paari rahi. I parauhia teie te moni e au no te mau mea ua pau, oia hoi, e piti milioni dara.

Ua moe roa a'enei, te tahi pahi auahi rahi, o "Yongala" te i'oa, o tei tere i te pae au no Ausaralia. Ua imi-maite-hia, aita râ i iteahia, e mata'i rahi roa tei tua i te taime i tere ai taua pahi ra, e ua mana'ohia ua parari i nia i te mato, e vahi mato rahi hoi te reira. E 150 taata tei nia te pahi, e aita râ te hoê i ora mai. Ua tomo atoa i tua te tahi pahi auahi o "Iroquois" to'na i'oa i te pae au no Amerika, e ua pohe roa 16 taata.

Ua haapaohia te mahana 22 no Tiunu nei ei mahana faakoronoraa no te arii ra o Tihoti e ta'na vahine o Maria na arii no Beritani. E ua mana'ohia e riro paha e piti hanere tausani taata te haere i Lonedona no te mau fenua e rave rahi, ei mataitai i taua ohipa hanahana rahi ra. Ua tarahuhia te tahi pahi apî o te "Olympic" to'na i'oa e na taata faufaa rahi e 50 no Amerika i te moni e ono hanere tausani dara ei afai atu i to ratou mau fetii e te mau hoa hoi i te fenua Beritani i te faakoronoraa arii. E tia i ra tatou i te hopea o taua ohipa ra.

Tei te fenua Amerika e o Europa te hoê pupu taata mata po o tei rave i te mau huru ohipa paari. E ua faataahia te tahi mau taata no roto mai i taua pupu taata mata po ra, ei hi'opoa i te mau ohipa i ravehia e ratou. Tera te rahi o te mau toroa i mauhia e ratou, oia hoi, hoê hanere tiahapa. Teie te tahi mau ohipa ta ratou e rave nei, oia hoi, te hahu taa ta te tahi, parai peni ta te tahi, haapao parau reva, ta te tahi te neneiraa vea. Ua itea atoa hoi te tahi taata mata po, i te paiumaraa i nia i te hoê mou'a tei-tei, oia hoi, 15,780 avae, e o Blanc to'na i'oa, tei Europa. E ua hamani te tahi i te mau pahi reva, e ua manuïa hoi, te tahi o taua mau pahi ra i te maue na te reva. E ua itea hoi te hoê taata mata po i Farani, o te hamani te mau tipi huru rau. E i te tufaa fenua o Long Island, i Amerika, ua faatupu te hoê pupu vahine mata po i te hoê totaite hamaniraa peue papaa, e ua manuïa roa taua ohipa ta ratou i rave nei. E e mea rahi te moni apî ta ratou i roaa, na roto i taua ohipa ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.